




# Aku & Buku

**Editors:**  
Fathiyah Ahmad @ Ahmad Jali  
Noor 'Izzati Ahmad Shafiai

2025



# Aku & Buku



**Editor:**

*Fathiyah Ahmad @ Ahmad Jali  
Noor 'Izzati Ahmad Shafiai*

**Penerbit:**

*UiTM Cawangan Kedah*

e ISBN 978-967-2948-81-0



9 789672 948810



# Hak Cipta

Hak cipta@ adalah milik penulis/pemilik asal. Penyuntingan bahasa dan pembacaan pruf telah dijalankan oleh pasukan editorial dengan kebenaran penulis.

Segala pandangan, pendapat dan syor teknikal yang dikemukakan oleh penyumbang adalah tanggungjawab mereka sepenuhnya dan tidak semestinya mencerminkan pendirian editor, fakulti atau universiti.

Tiada bahagian dalam penerbitan ini yang boleh diterbitkan atau dipindahkan dalam apa jua bentuk atau cara, sama ada secara elektronik atau mekanikal, termasuk fotokopi, salinan semula atau sebarang sistem simpanan dan capaian, tanpa kebenaran bertulis daripada Rektor, UiTM Cawangan Kedah, 08400 Kedah.

**eISBN:** 978-967-2948-81-0

**Diterbitkan oleh:**

Universiti Teknologi MARA  
08400 Merbok, Kedah, Malaysia

**Editor:**

Fathiyah Ahmad @ Ahmad Jali  
Noor 'Izzati Ahmad Shafiai



# Kandungan

## Tajuk

## Muka Surat

### Kata Pengantar

### Kata Aluan

### Pendahuluan

1. Peneman Setia	1
2. Cinta Ekonometrik dan Cinta Residual	5
3. Inspirasi Dale Carnegie	8
4. Aku, Buah dan Buku	15
5. Dari Cerita Dongeng, Akhirnya Menggapai Impian	20
6. Aku di Alam Buku	24
7. Kisah Imam Syafie	27
8. Menyingkap Kegemilangan Umat Islam di Andalusia	33
9. Kisah Penaklukan Kota Konstantinople oleh Sultan Muhammad Al-Fateh	39
10. Bukuku adalah Teman Karibku	45
11. Korban Kasih	51
12. Buku, Penyelamatku	54
13. Aku, Abah dan Buku	58
14. Sebuah Buku Berwarna Coklat	62
15. TAMAR JALIS: Stephen King Malaya	65
16. Jasa Terindah	68
17. Ditandang Lagi	71
18. Anak Sulung	76
19. Inspirasi Membentuk Jatidiri	79
20. Dari Lemari Antik Moyang ke Troli e-Dagang	82
21. Menara Alam dan Kimia Manusia	86
22. Minat Membaca yang Hilang	91
23. Satu Jam Boleh Merubah Hidup	93
24. Pengembaraan Melalui Kuasa Petikan	96
25. Kāna yāmā kān	99
26. Aku, Buku dan Secangkir Kopi	102
27. Manisnya Senyumanmu	105
28. Anak-anakku & Buku	110
29. Buku Mendidik Aku	114
30. Sebuah Perjalanan Menemukan Diri	118
31. Menggenggam Bara	122
32. Diari Perjalanan Aku dan Buku	126
33. Kertas-kertas yang Harum	129
34. Pasti Ada Minatku	132
35. Aku, 'Buku Pink' dan Tesis: Kisah Kerinduan, Penantian dan Harapan	135
36. Kehidupan dalam Kata: Buku Guru Sebuah Kehidupan	140
37. Manga dan Aku	144
38. Dirimu Sentiasa Ada!	148
39. Sihat with Me	152
40. Aksaramu Inspirasiku	155
41. Kerana Sebuah Buku	159
42. Pahit Manis Pengalaman Bersama Buku	161
43. Ibrah Melalui Syukur	165
44. Kenangan Itu	168
45. Perjalanan Literasi: Dari Perpustakaan Sekolah Hingga ke Universiti	172
46. Buku "Tangan Kedua"	176
47. "달콤한 추억" di Bumi Korea	180
48. Pi Mai Pi Mai Bersua di PBAKL 2024	183
49. Baca Buku? Nerdlah Pulak!	186
50. Kekuatan di Sebalik Buku Pemberian Sahabat	190



# Kata Pengantar

Projek Aku & Buku ini merupakan sebuah inisiatif murni oleh Akademi Pengajian Bahasa, Universiti Teknologi MARA Cawangan Kedah yang menghimpunkan karya penulisan kreatif oleh seluruh warga Universiti Teknologi MARA (UiTM) dari pelbagai fakulti dan jabatan. Kompilasi ini adalah manifestasi semangat cinta terhadap ilmu, bahasa, dan budaya, serta usaha berterusan untuk memupuk pemikiran kritis dan ungkapan kreatif di kalangan warga universiti.


Penulisan dan penerbitan merupakan antara medium utama dalam penyebaran ilmu, dan ia memainkan peranan penting dalam pembentukan masyarakat berilmu dan berbudaya. Namun di samping kesibukan menulis artikel ilmiah berimpak tinggi, projek Aku & Buku muncul bagi menawarkan peluang warga universiti untuk menulis buah fikiran dan pengalaman peribadi dalam bentuk santai namun sampai ke hati pembaca. Himpunan karya-karya kreatif ini bukan sahaja menyemarakkan lagi arena kesusasteraan tanah air, tetapi turut memberi peluang kepada para akademik untuk menyuarakan idea, pandangan, dan imaginasi mereka dalam bentuk yang segar dan bermakna.

Sebagai institusi pengajian tinggi yang sentiasa mendokong nilai keilmuan dan pengembangan minat dalam apa jua bentuk penulisan, UiTM berbangga dapat menyokong dan merealisasikan penerbitan buku ini. Semoga karya-karya yang terkandung dalam kompilasi ini menjadi sumber inspirasi dan rujukan berharga kepada pembaca dari pelbagai lapisan masyarakat.

Setinggi-tinggi penghargaan diucapkan kepada semua penulis yang telah menyumbangkan karya serta pihak yang terlibat dalam menjayakan penerbitan ini.

Selamat membaca.

Ketua Editor,  
**Fathiyah Ahmad @ Ahmad Jali**  
**Noor 'Izzati Ahmad Shafiai**





# Kata Aluan



Alhamdulillah, setinggi-tinggi kesyukuran dipanjatkan ke hadirat Illahi kerana dengan izin-Nya, Projek Aku & Buku berjaya diterbitkan. Kompilasi ini merupakan manifestasi minat yang tinggi terhadap bahasa dan penulisan kreatif, yang lahir daripada ilham serta komitmen seluruh warga Universiti Teknologi MARA (UiTM).

Setinggi-tinggi penghargaan dan terima kasih diucapkan kepada semua penulis yang telah menyumbangkan karya, serta warga kerja yang terlibat dalam menjayakan projek ini. Usaha ini membuktikan bahawa institusi pengajian tinggi bukan sahaja menjadi medan penyebaran ilmu, malah turut menyemarakkan elemen budaya dan kreativiti dalam penulisan.

## **Unit Penerbitan**

Fathiyah Ahmad @ Ahmad Jali  
Noor 'Izzati Ahmad Shafiai  
Siti Mukhlisa Mohamad Khairul Adilah  
Nurfarisya Hafiz  
Berlian Nur Morat  
Nor Asni Syahriza Abu Hassan  
Syakirah Mohammed  
Hajjah Sharina Saad  
Mas Aida Abd Rahim  
Syazliyati Ibrahim  
Abdul Majeed Ahmad

## **Penyunting**

Berlian Nur Morat

## **Pereka Layout & Grafik**

Asrol Hasan

Semoga buku ini menjadi inspirasi kepada para pembaca dan terus menggalakkan penghasilan karya kreatif yang berkualiti pada masa akan datang.

Sekian, terima kasih.



# Pendahuluan

Penulisan kreatif merupakan medium penting dalam menyampaikan nilai, emosi dan pemikiran masyarakat. Ia bukan sekadar hiburan, malah berperanan dalam mencorak budaya intelektual dan memperkaya khazanah ilmu. Projek Aku & Buku ini merupakan sebuah himpunan karya penulisan kreatif yang lahir daripada ilham dan bakat warga akademik, khususnya dari Akademi Pengajian Bahasa, Universiti Teknologi MARA (UiTM) Cawangan Kedah, serta sumbangan penulis dari fakulti dan institusi lain.

Kompilasi ini menampilkan pelbagai genre dan gaya penulisan yang mencerminkan kepelbagaian latar belakang dan pengalaman para penulisnya. Usaha ini sejajar dengan aspirasi UiTM dalam menggalakkan budaya penulisan, penyelidikan, dan penerbitan sebagai tunjang penyebaran ilmu yang berterusan kepada masyarakat.

Menerbitkan karya kreatif dalam bentuk buku bukan sahaja membuka ruang kepada ekspresi diri, tetapi juga memperkukuh peranan institusi pengajian tinggi dalam memperkaya wacana sastera tempatan. Semoga buku ini dapat menjadi pencetus inspirasi, pemangkin idea, serta wadah untuk menyemai minat terhadap dunia penulisan dan pembacaan.



## Aku, 'Buku Pink' dan Tesis: Kisah Kerinduan, Penantian dan Harapan

**Nurul 'Uyun i Ahmad**

Pengajian Kejuruteraan Kimia, Kolej Pengajian Kejuruteraan,  
UiTM Cawangan Terengganu, Kampus Bukit Besi

Setiap kali melihat pasangan lain mendukung anak kecil mereka, hati ini cepat tersentuh. Namun, perasaan gembira dan kebahagiaan lebih mudah menerpa apabila menyaksikan senyuman dan tawa si kecil yang menjadi penawar bagi ibu bapanya. Perasaan itu, walaupun bercampur aduk, telah mengajar aku untuk tetap bersyukur dan terus berharap agar suatu hari nanti aku juga akan merasai kebahagiaan yang sama ketika mendukung zuriat sendiri.

Pada 25 Ogos 2020, aku telah mendapat surat tawaran menyambung pengajian pada peringkat Doktor Falsafah (Ph.D) secara sepenuh masa dan bercuti belajar. Aku tidak menunggu lama untuk menguruskan keperluan dokumen. Urusan pertamaku adalah melakukan pemeriksaan kesihatan. Sebelum pergi ke klinik pada pagi itu, aku melakukan ujian kehamilan sendiri di rumah kerana aku telah lewat kedatangan haid. Aku melakukannya kerana naluriku kuat untuk mengesahkan kehamilan sebelum melakukan ujian x-ray separa badan pada siang nanti.

Pada mulanya, hanya satu garisan kelihatan di alat ujian kehamilan itu. Tapi entah kenapa, aku serongkan *kit* tersebut dengan lebih lama bagi memastikan seluruh kawasan telah dipenuhi. Beberapa saat kemudian, ada garisan kedua muncul! Sah! Ujian kehamilanku positif. Aku menunjukkan *kit* tersebut kepada suami. Dia merenung setengah percaya. Khuatir sangkaan kami meleset, dia mengesyorkan agar aku membuat pemeriksaan lanjut di Klinik Fatimah siang nanti.

Kami menunggu keputusan ujian kehamilan di Klinik Fatimah dengan penuh debaran. Ternyata aku hamil! Alhamdulillah! Entah berapa liter air mataku tumpah saat menyampaikan berita gembira tersebut kepada orang tua kami, adik-beradik, dan sahabat-sahabat terdekat. Akhirnya pada tahun kesembilan perkahwinan kami, aku dikurniakan "buku pink" pertamaku. Bagi ibu-ibu lain, mungkin "buku pink" hanyalah sebuah buku rekod biasa. Tetapi bagiku, "buku pink" ini adalah simbol kebahagiaan dan jawapan kepada sebuah penantian yang lama.

Walaupun perasaan gembira menyambut kehadiran si kecil menguasai hati, namun perasaan takut dan cemas turut menyelubungiku. Ketika itu, Malaysia masih berada dalam tempoh Perintah Kawalan Pergerakan Pemulihan (PKPP). Justeru, sepanjang tempoh itu, aku mengambil langkah berhati-hati termasuklah mengurangkan aktiviti di luar rumah, mengelakkan diri daripada menghadiri perhimpunan sosial dan lebih mengutamakan kesihatan dengan menjaga pemakanan di rumah.

Tempoh kehamilanku adalah selari dengan pengajianku pada semester satu. Aku menghadiri kelas-kelas wajib universiti secara atas talian. Pembentangan dan mesyuarat bersama penyelia berlaku dengan kerap. Di tengah kesibukan menyelesaikan tugas akademik, aku selalu mengingatkan diri bahawa aku tidak keseorangan. Anak kecil dalam

rahimku setia menemani, termasuk ketika aku meluangkan masa untuk hobiku, iaitu membaca buku.

Buku yang wajib dibaca semestinya ialah 'buku pink'. Maklumlah, anak pertama, tiada pengalaman melainkan melalui pembacaan dan perbincangan. Aku bersyukur kerana 'buku pink' itu wujud dan sentiasa dikemaskini untuk memastikan kesihatan dan perkembangan kehamilanku. 'Buku pink' memberikan kefahaman akan setiap perubahan yang berlaku dalam tubuhku serta kandunganku. Ia adalah panduan yang sungguh tak ternilai.

Sepanjang kehamilanku juga, aku sempat membaca dua buah buku hasil tulisan Hasrizal Abdul Jamil, iaitu "Erti Beragama Yang Hilang" dan "Seni Berfikir Yang Hilang". Buku-buku ini menekankan agar masyarakat mengamalkan nilai-nilai agama yang betul, dan memiliki kebijaksanaan untuk berfikir secara kritis dalam menghadapi pelbagai cabaran kehidupan. Selain itu, buku-buku ini menjadi panduan berguna dalam usaha membentuk diriku yang seimbang dari segi spiritual dan intelektual.



Buku "Erti Beragama Yang Hilang" dan "Seni Berfikir Yang Hilang".

Pada 6 April 2021, lahirlah puteri kami yang comel, hadiah yang tidak ternilai untuk kami setelah sedekad perkahwinan. Suara tangisannya yang pertama kedengaran pada jam 10.07 pagi. Suamiku berkongsi berita gembira ini dengan seluruh ahli keluarga melalui aplikasi WhatsApp. Siapa saja tidak gembira dengan perkhabaran ini? Pasti satu dunia bersama-sama kami mensyukuri kelahiran puteri kami!

Kami menamakan bayi kecil ini dengan Hanin Aqilah. Hanin (حنين) bermaksud rindu dan Aqilah (عقيلة) bermaksud bijaksana. Hanin adalah nama yang aku pilih, manakala Aqilah adalah hasil perbincangan bersama suami dan guru Bahasa Arab. Kami mendoakan agar bayi kecil ini menjadi qurratu'ayun (penyejuk mata), insan yang sentiasa merindukan kebaikan dan bijaksana dalam urusan agama serta kehidupan yang dilaluinya, inshaAllah.

Rumah yang dulu sunyi kini dipenuhi dengan tangisan bayi dan suara manjanya. Memang kekok pada mulanya, tetapi penuh dengan kegembiraan dan cabaran yang baharu. Kami belajar untuk menyesuaikan jadual harian kami bagi memastikan keperluan si puteri sentiasa dipenuhi. Waktu tidur yang teratur menjadi kenangan, diganti dengan malam-malam yang diisi dengan belaian kasih sayang dan penjagaan.

Kehadiran si puteri telah meningkatkan kerjasama antara aku dan suami, mengingatkan kami akan janji lama untuk menjadi pasangan yang komited dalam penjagaan dan pendidikan anak-anak. Walaupun penat dan kadang kala amat letih dengan kehidupan sebagai ibu dan bapa ditambah lagi dengan komitmen pengajian, namun kebahagiaan yang dirasai tidak dapat digambarkan dengan kata-kata.

Kami sedar bahawa inilah pengorbanan dan tanggungjawab sebagai ibu bapa yang sering diperkatakan. Setiap hari, kami berusaha memastikan si kecil mendapat perhatian dan keperluan secukupnya. Kami juga membahagikan tugas agar beban dikongsi bersama. Walaupun kadang kala berasa letih, semangat untuk memberikan yang terbaik kepada keluarga sentiasa menguatkan kami. Dengan sokongan antara satu sama lain, kami semakin cekap dalam menguruskan rumahtangga.

Ketika usia anakku mencecah sembilan bulan, aku membawanya tinggal di Kuala Lumpur untuk menyelesaikan kerja-kerja makmal. Saat itu, kami berdua duduk berasingan dengan bapanya yang menetap di Dungun. Ketika itu, dia masih belum mendapat tempat di taska kerana kuota yang telah penuh. Betapa sukarnya aku ketika itu. Namun, semua itu terubat apabila keputusan 'lulus' diumumkan untuk cadangan penyelidikan. Betapa manisnya saat itu bila aku teringat semula.

Anakku diterima masuk ke taska pada April 2022, iaitu semasa aku berada pada semester keempat. Allah SWT saja yang tahu betapa bersyukur dan leganya perasaanku ketika itu. Lantas, aku segera memulakan kerja-kerja makmal mengikut perancangan yang telah dibuat. Walaupun jadualku terlalu padat, aku bersyukur kerana 'buku pink' anakku mengingatkan aku tentang jadual vaksinasi dan catatan tumbesaran anak.

Minggu berganti minggu, bulan berganti bulan, tahun berganti tahun. Pada pertengahan semester keenam pengajianku, kami meninggalkan Kuala Lumpur dan kembali ke Dungun. Proses perpindahan dari Kuala Lumpur ke Dungun mengambil masa lebih kurang sebulan. Aku mengalami kepenatan yang melampau. Sakit pinggang yang dialami amat luar biasa dan haid juga telah terlewat seminggu. Mungkin asbab terlalu penat.

Namun, entah kenapa, naluriku terdetik untuk membuat ujian kehamilan pula tanpa meletakkan sebarang harapan. Pada subuh Hari Raya Aidiladha, aku melakukan ujian kehamilan. Ternyata *mother instinct* yang Allah SWT kurniakan itu benar; aku hamil buat kali kedua dengan usia janin sudah mencecah sebulan! Allahurabbi, ini bukannya mimpi, tetapi realiti yang indah dan penuh keajaiban!

Alhamdulillah! Allah SWT mengurniakan kami anak kedua ketika aku dan Hanin Aqilah telah kembali ke Dungun. Aturan-Nya amat ihsan, kerana Dia tahu aku tidak dapat mengendalikan trimester pertama sendirian jika masih berjarak jauh. 'Buku pink' kedua dibuka pada Ogos 2023, dan kali ini aku lebih yakin mengharungi tempoh kehamilan kerana pengalaman lalu banyak mengajarku.

Sepanjang kehamilan kedua, aku mengulang pembacaan buku "Erti Beragama Yang Hilang" dan "Seni Berfikir Yang Hilang" yang pernah aku baca semasa kehamilan pertama dahulu. Rasanya, aku belum sepenuhnya menghayati tulisan penulis tersebut pada bacaan pertama. Mengulang pembacaan telah memberikan perspektif yang berbeza terhadap intipati penulisan berbanding ketika membacanya buat kali pertama dahulu.

Buku "Erti Beragama Yang Hilang" membincangkan bagaimana masyarakat moden sering kehilangan makna sebenar dalam beragama. Buku ini menekankan bahawa beragama bukan hanya sekadar amalan ritual, tetapi lebih kepada memahami dan menghayati nilai-nilai agama dalam kehidupan seharian serta mengamalkannya untuk mendekatkan diri kepada Tuhan dan memperbaiki hubungan dengan sesama manusia.

"Seni Berfikir Yang Hilang" pula menyoroti kepentingan pemikiran kritis dan kemampuan berfikir secara mendalam. Penulis menegur kecenderungan menerima informasi secara pasif

dalam era maklumat yang cepat, dan mengajak pembaca untuk mengasah pemikiran reflektif dan kritis, menilai suatu perkara dari pelbagai perspektif, serta mencari kebenaran dengan pendekatan yang intelektual dan adil.

Sembilan bulan berlalu dengan pelbagai kemajuan dalam kehidupanku sebagai seorang pelajar dan ibu anak satu. Pada 19 Februari 2024, anak keduaku lahir dan kami berikan nama Abdullah Hanan. Abdullah (عبدالله) bermaksud Hamba Allah SWT, manakala Hanan (حنان) bermaksud kasih sayang. Kehidupan kami kini telah lengkap dengan sepasang zuriat yang comel dan bijak. Alhamdulillah wa syukurillah.

Aku amat bahagia atas rezeki kehidupan yang selama ini aku idamkan. Namun, ada kalanya aku mengalami krisis perasaan atas faktor luaran yang aku tidak dapat kawal. Di saat aku merancang untuk Grade-on-Time (GOT) dalam pengajianku, jangkaanku telah meleset atas faktor pandemik COVID-19. Apabila pandemik COVID-19 menyerang, jadual pengajianku tertangguh dan perubahan besar terhadap garis masa memaksa aku untuk merancang strategi baru.

Dalam tempoh cuti belajar juga, aku dikurniakan dua orang anak yang tidak disangka-sangka, iaitu pada awal semester ke-2 dan akhir semester ke-7. Mereka lahir ketika mana aku telah reda dengan ketentuan hidupku dan fokusku untuk mengejar impian akademik pula. Pertindihan keutamaan ini seringkali membuat aku bingung. Mengimbangi kedua-duanya bukanlah mudah kerana ia menuntut komitmen serentak.

Ya, jiwaku bergelora setiap kali merasakan tekanan ini. Acapkali aku mencari asbab dan solusi untuk bertenang dengan bertanyakan dan merasionalisasikan diri sendiri. Bukanlah aku tidak bersyukur, tapi aku juga manusia biasa yang perlahan-lahan sedang berdamai dengan perjalanan hidupku. Justeru, aku sering memujuk diri bahawa Allah SWT tidak sesekali akan membebankan aku di luar kemampuanku seperti firman-Nya dalam Surah Al-Baqarah (2:286).

Aku teringat akan hikmah dan intipati daripada buku "Erti Beragama Yang Hilang" yang begitu erat kaitannya dengan perjalanan hidupku. Di saat aku melalui krisis perasaan dan tekanan akibat faktor luaran seperti pandemik Covid-19, aku perlu bersyukur kepada Allah kerana masih mengurniakan usia yang panjang, meskipun telah dijangkiti wabak ini sebanyak dua kali. Salah satu daripadanya berlaku ketika aku sedang mengandungkan anak kedua. Segala yang terjadi adalah untuk mendekatkan diriku kepada-Nya.

Penulis juga 'mengajakku' untuk berfikir secara kritis, bukan sekadar mengikuti emosi atau menerima keadaan tanpa pemikiran mendalam. Beliau secara tidak langsung menekankan pentingnya pemikiran reflektif dalam menangani situasi yang tidak menentu, terutama dalam menghadapi cabaran hidupku sendiri. Aku menyedari kekurangan diriku, namun pada masa yang sama, aku terus mencari solusi dan hikmah di sebalik setiap cabaran.

Tahun 2020 sehingga 2024 ini telah membawa aku melalui pelbagai liku kehidupan yang penuh dengan cabaran, perubahan, dan refleksi diri. 'Buku-buku pink' yang pada mulanya hanya menjadi panduan kesihatan kehamilanku, kini menjadi simbol cinta, ketabahan, dan komitmen dalam memastikan kesejahteraan diriku secara mental dan fizikal dengan perkembangan anak-anakku. Setiap catatan di dalamnya adalah saksi bisu kepada pengorbanan dan doa-doa yang tidak pernah putus.

Manakala, tesis yang pada awalnya kelihatan seperti sebuah puncak yang sukar digapai, kini bakal menjadi bukti kesungguhan dan dedikasi. Dalam setiap helaiannya, terselit cerita tentang penat lelah yang tak berpenghujung, dan perjuangan yang tidak pernah padam. Meskipun perjuangan ini akan mengambil masa yang lebih lama daripada perancangan asal,

namun ia adalah manifestasi impian yang suatu masa nanti akan tercapai. Seperti dalam firman Allah SWT dalam Surah Al-Imran (3:54) yang bermaksud,


*"Dan mereka merancang, Allah SWT juga merancang. Dan Allah SWT adalah sebaik-baik perancang."*

Firman ini mengingatkan aku bahawa, sebaik manapun aku merancang, perancangan Allah SWT adalah yang paling sempurna dan ada rahsia-Nya. Ayat ini selalu diputar semula agar memberikan ketenangan kepadaku, bahawa setiap kejadian, sama ada baik atau buruk, pasti penuh hikmah. Jelas sekali Allah SWT mengetahui apa yang terbaik untukku. Segala yang berlaku untuk mematangkan lagi diriku, walaupun kadang-kala aku sendiri tidak dapat segera memahaminya.

'Ala kulli hal', kini aku telah kembali bekerja. Tumpuanku kembali kepada tugas hakiki, tempat aku mencari nafkah untuk diri dan keluarga. Aku sedang menyesuaikan diri semula dengan jadual bekerja dan mengimbangi tanggungjawab sebagai seorang ibu, isteri, dan pelajar separuh masa. Walaupun pada awalnya terasa seperti ombak menggulung jiwa, Allah SWT sentiasa membantuku untuk kembali kepada-Nya. Semoga segala usaha dan pengorbanan ini mendapat keberkatan dan dirahmati Allah SWT.


Buat anak-anak mak, mak bersyukur atas segala anugerah dan kekuatan yang diberikan oleh Allah SWT kepada mak sepanjang tempoh ini. Kehadiran kalian menjadi pendorong utama, memberikan semangat dan harapan yang tidak ternilai. Setiap detik bersama kalian adalah inspirasi untuk terus melangkah maju dan menyelesaikan apa yang telah mak mulakan. Mak berharap kalian akan membesar dengan penuh kasih sayang, kebaikan, dan kecemerlangan dalam setiap aspek kehidupan di dunia dan akhirat. Kepada-Mu Ya Allah, kami bertawakal.

***INSHAALLAH, SEMUANYA AKAN BAIK-BAIK SAJA.***



# Aku & Buku

2025



e ISBN 978-967-2948-81-0



9 789672 948810

